



中国经典名著

全宋词

(九)

刘 丰 褚为良 編集

学苑音像出版社

目 录

洪 适.....	员
韩元吉	源
朱淑真	苑
张 抡	愿
侯 寘.....	源
赵彦端.....	园
王千秋.....	远
李 吕	源
李流谦.....	员
袁去华.....	园
朱 雍.....	愿

洪 适

番禺调笑

句队

盖闻五岭分疆，说番禺之大府；一尊属客，见南伯之高情，摭遗事于前闻，度新词而屡舞。宫商递奏，调笑入场。

羊仙

黄木湾头声闐闐然。碧云深处起非烟。骑羊执穗衣分锦，快睹浮空五列仙。腾空昔日持铜虎。嘉瑞能名灼前古。羽人叱石会重来，治行于今最南土。

南土。贤铜虎。黄木湾头腾好语。骑羊执穗神仙五。拭目摩肩争睹。无双治行今犹古。嘉瑞流传乐府。


药洲

传闻南汉学飞仙。炼药名洲雉堞边。炉寒灶毁无踪迹，古木闲花不计年。惟余九曜巉岩石。寸寸沦漪湛天碧。画桥彩舫列歌亭，长与邦人作寒食。

寒食。人如织。藉草临流罗饮席。阳春有脚森双戟。和气欢声洋溢。洲边药灶成陈迹。九曜摩挲奇石。

海山楼

— 员 —



高楼百尺迤严城。披拂雄风襟袂清。云气笼山朝雨急，海涛侵岸暮潮生。楼前箫鼓声相和。戢戢归樯排几柁。须信官廉蚌蛤回，望中山积皆奇货。

奇货。归帆过。击鼓吹箫相应和。楼前高浪风掀簸。渔唱一声山左。胡床邀月轻云破。玉尘飞谈惊座。

素馨巷

南国英华赋众芳。素馨声价独无双。未知蟾桂能相比，不是人间草木香。轻丝结蕊长盈穗。一片瑞云萦宝髻。水沈为骨麝为衣，剩馥三熏亦名世。

名世。花无二。高压阁提倾末利。素丝缕缕联芳蕊。一片云生宝髻。屑沈碎麝香肌细。剩馥熏成心字。


朝汉台

尉佗怒臂帝番禺。远屈王人陆大夫。只用一言回倔强，遂令魑魅结襟裾。使归已实千金橐。朝汉心倾比葵藿。高台突兀切星辰，后代登临奏音乐。

音乐。传佳作。盖海旌幢开观阁。绮霞飞渡青油幕。好是登临行乐。当时朝汉心倾藿。望断长安城郭。

浴日亭

扶胥之口控南溟。谁凿山尖筑此亭。俯窥贝阙蛟龙跃，远见扶桑朝日升。蜃楼缥缈擎天际。鹏翼缤纷借风势。蓬莱可望不可亲，安得轻舟凌弱水。



弱水。天无际。相去扶胥知几里。高亭东望阳乌起。杲杲晨光初洗。蓬莱欲往宁无计。一展弥天鹏翅。

蒲涧

古涧清泉不歇声。昌蒲多节四时青。安期驾鹤丹霄去，万古相传此化城。依然丹灶留岩穴。桃竹连山仙境别。年年正月扫松关，飞盖倾城赏佳节。

佳节。初春月。飞盖倾城尊俎列。安期驾鹤朝金阙。丹灶分留岩穴。山中花笑秦皇拙。祠殿荒凉虚设。

贪泉

桄榔色暗芭蕉繁。中有贪泉涌石门。一杯便使人心改，属意金珠万事昏。晋时贤牧夷齐比。酌水题诗心转厉。只今方伯擅真清，日日取泉供饮器。


饮器。贪泉水。山乳涓涓甘似醴。怀金嗜宝随人意。枉受恶名难洗。真清方伯端无比。未使吴君专美。

沈香浦

炎区万国侈奇香。捆载归来有巨航。谁人不作芳馨观，巾筐宁无一片藏。饮泉太守回瓜戍。搜索越装舟未去。慧苴何从起谤言，沈香不惜投深浦。

深浦。停舟处。只恐越装相染污。奇香一见如泥土。投著水中归去。令公早晚回朝著。

— 猿 —



无物迟留鸣舻。

清远峡

腰支尺六代难双。雾鬓风鬟巧作妆。人间不似山间乐，身在帝乡思故乡。南来万里舟初歇。三峡重过惊久别。玉环留著缀相思，归向青山啸明月。

明月。舟初歇。三峡重过惊久别。玉环留与人间说。诗罢离肠千结。相思朝暮流泉咽。雾锁青山愁绝。

破子

南海。繁华最。城郭山川雄岭外。遗踪嘉话垂千载。竹帛班班俱在。元戎好古新声改。调笑花前分队。高会。尊罍对。笑眼茸茸回盼睐。蹋筵低唱眉弯黛。翔凤惊鸾多态。清风不用一钱买。醉客何妨倒载。


遣队

十眉争艳眼波横。蛺蝶回风曲已成。绛蜡飘花香卷穗，月林乌鹊两三声。歌舞既终，相将好去。

句降黄龙舞

伏以玳席接欢，杯滢东西之玉；锦裯唤舞，钗横十二之金。咸驻目于垂螺，将应声而曳茧。岂无本事，愿吐妍辞。

— 源 —



答

眄流席上，发水调于歌唇；色授裾边，属河东之才子。未满飞鹤之愿，已成别鹄之悲。折荷柄而愁缕无穷，翦蛟绡而泪珠难贯。因成绝唱，少相清欢。

遣

情随杯酒滴郎心。不忍重开翡翠衾。封却软绡看锦水，水痕不似泪痕深。歌罢舞停，相将好去。

句南吕薄媚舞

羽觞棋布，治主礼于良辰；翠袖弓弯，奏女妖之妍唱。游丝可倩，本事愿闻。

答

踢软尘之陌，倾一见于月肤；会采萍之洲，迷千娇于雨梦。且蛾眉有伐性之戒，而狐媚无伤人之心。既吐艳于幽闺，能齐芳于节妇。果六尺之躯不庇其伉俪，非三寸之舌可脱于艰难。尚播遗声，得尘高会。


遣

兽质人心冰雪肤。名齐节妇古来无。纤罗不蜕西州路，争得人知是艳狐。歌舞既阑，相将好去。

渔家傲引

伏以黄童白叟，皆是烟波之钓徒；青笠绿蓑，不识衣冠之盛事。长浮家而醉月，更辍棹以吟风。乐哉生涯，

— 缘 —



翻在乐府。相烦女伴，渔父分行。

词

正月东风初解冻。渔人撒网波纹动。不识雕梁并绮栋。扁舟重。眠鸥浴雁相迎送。

溪北画桥弯蝓蚓。溪南古岸添青葢。长把鱼钱寻酒瓮。春一梦。起来拈笛成三弄。

二月垂杨花糝地。荻芽迸绿无际。细雨斜风浑不避。青笠底。三三两两鸣榔起。

新妇矶边云接袂。女儿浦口山堆髻。一拥河豚千百尾。摇食指。城中虚却鱼虾市。

三月愁霖多急雨。桃江绿浪迷洲渚。西塞山边飞白鹭。烟横素。一声欸乃山深处。

红雨缤纷因水去。行行寻得神仙侣。楼阁五云心不住。分凤侣。重来翻恨花相误。


四月圆荷钱学铸。鳞鳞波暖鸳鸯语。无数燕雏来又去。鱼未取。钓丝直上晴蜓聚。

风弄碧漪摇岛屿。奇云蘸影千峰舞。骑马官人江上驻。天且暮。借舟送过沧浪渡。

五月河中菱苒遍。丝纶欲下相萦绊。却掉船来芳草岸。呼侣伴。蓑衣不把金章换。

碧落云高星烂烂。波心举网星光乱。跃出鲤鱼长尺半。回首看。孤灯一点风吹散。

— 远 —



六月长江无暑气。怒涛漱壑侵沙觜。飏飏轻舟随浪起。何不畏。从来惯作风波计。

别渚藕花舒锦绮。采莲三五谁家子。问我买鱼相调戏。飘菱制。笑声咭咭花香里。

七月凉秋飞叶响。长吟杳杳澄江上。秃尾槎头添一网。丝自纺。新炊菰饭更相饷。

渡口青烟藏叠嶂。岸旁红蓼翻轻浪。鸂鶒沈浮双漾漾。闻鸣桨。高飞拍拍穿林莽。

八月紫莼浮绿水。细鳞巨口鲈鱼美。画舫问渔篙暂杪。欣然喜。金莼顷刻尝珍味。

涌雾驱云天似洗。静看星斗迎蟾桂。枕棹眠蓑清不睡。无名利。谁人分得逍遥意。

九月芦香霜旦旦。丹枫落尽吴江岸。长濑黄昏张蟹断。灯火乱。圆沙惊起行行雁。


半夜系船桥北岸。三杯睡著无人唤。睡觉只疑桥不见。风已变。缆绳吹断船头转。

十月橘洲长鼓枻。潇湘一片尘缨洗。斩得钓竿斑染泪。中夜里。时闻鼓瑟湘妃至。

白发垂纶孙又子。得钱沽酒长长醉。小艇短篷真活计。家云水。更无王役并田税。

子月水寒风又烈。巨鱼漏网成虚设。围网从它归丙穴。谋自拙。空归不管旁人说。

— 苑 —



昨夜醉眠西浦月。今宵独钓南溪雪。妻子
一船衣百结。长欢悦。不知人世多离别。

腊月行舟冰凿罅。潜鳞透暖偏堪射。岁岁
年年篷作舍。三冬夜。牛衣自暖何须借。

滕六晚来方命驾。千山绝影飞禽怕。江上
雪如花片下。宜入画。一蓑披著归来也。

破子

渔父饮时花作荫。羹鱼煮蟹无它品。世代
太平除酒禁。酒父饮。绿蓑藉地胜如锦。

渔父醉时收钓饵。鱼梁晒翅闲乌鬼。白浪撼
船眠不起。渔父醉。滩声无尽清双耳。

渔父醒时清夜永。澄澜过尽征鸿影。略略
风来敲舴艋。渔父醒。月高露下衣裳冷。

渔父笑时莺未老。提鱼入市归来早。一叶
浮家生计了。渔父笑。笑中起舞渔家傲。

遗队


春留冬及一年中。杜若洲边西又东。舞散曲终人不
见，一天明月一溪风。水绿山青，持竿好去。

鹧鸪天

次李举之见寄韵

报答风光思更新。安排好语续阳春。罗胸

— 愿 —



玉藻英华别，信手银钩点画匀。

歌妙曲，想光尘。相望尺五叹参辰。曲终
强对红颜笑，欠我高谈惊座人。

生查子

收灯日次李举之韵

廉纤小雨来，噤瘳轻寒乍。丝竹送迎时，
灯火阑珊夜。

铜壶漏故迟，银烛花频爇。怀我独醒人，
健笔方飞洒。

蝶恋花

漠漠水田飞白鹭。夏木阴阴，巧啭黄鹂语。
金匱诗人新得句。江山应道来何暮。


好向金门联步武。何事双旌，却为丹丘驻。
琼斝十分须一举。看看紫诏催归去。

减字木兰花

曾觌父落成小阁，次其韵

藩车容裔。挺挺风流追两地。粲斗分星。

— 怨 —



诗句当年汗简青。

疏帘披绣。共看横云晴出岫。新月如钩。
来照琼彝醉小楼。

好事近 东湖席上次曾守韵，时幕曹同集

风细晚轩凉，妙句初挥新墨。绿水池中宾
佐，对嫩荷擎绿。

坐看微月上云头，清臂映寒玉。只恐朝来
酒醒，有文书羁束。

虞美人

芭蕉滴滴窗前雨。望断江南路。乱云重叠
几多山。不似倦飞鸥鹭、便知还。


角声更听谯门弄。夜夜思归梦。鄱江楼下
水含漪。孤负钓滩烟艇、绿蓑衣。

卜算子 席上赠瞻明

修竹拂疏棂，淡月侵凉榭。四畔青山进好
风，金鸭香煤爇。

宝唾粲珠玑，长袖飘兰麝。莫问更楼夜若

— 四 —



何，且结高阳社。

江城子

赠举之

冥冥云屿两经秋。落霞收。断烟留。小阁凉生，清馥凝金虬。乘兴开颜那草草，烦玉腕，举琼舟。

明年此日楚江头。极层楼。望丹丘。只恐溪山，千里碍凝眸。重倚阑干相忆处，寻过雁，作书邮。

减字木兰花

太守移具饯行县偶作


使君情素。念我明朝行县去。一醉相留。和气欢声到小楼。

暂时南北。莫唱渭城朝雨曲。此去农郊。收拾童儿五袴谣。

浣溪沙

邦伯今推第一流。几因歌席负诗筹。一时文采说台州。

— 跋 —



雨脚渐收风入牖，云心初破月窥楼。翠眉
相映晚山秋。

望海潮

题双岩堂

重溟倒影，五芝含笑，神仙今古台州。山
拥黄堂，烟披画戟，双岩瑞气长浮。前事记鳌
头。有百年台榭，千室嬉游。墨宝凄凉，风凌
雨蠹尽悠悠。

规恢共仰贤侯。当政成五月，景对三秋。
飞栋干云，虚檐受露，放怀不减南楼。宾燕奉
觥筹。妙绮笺琼藻，声度歌喉。只恐棠阴成后，
趣去侍凝旒。

好事近

小阁过重阳，愁对轻篁团色。喜得蛮笺新
唱，似夜光明月。

萸房菊蕊定相怜，酩酊误蕉叶。犹记去年
今夜，听歌声清切。



清平乐

次曾守韵

风鬟飞乱。寒入秦筝雁。情似云阴浑未展。
雨脚更飘银线。

横枝有意先开。玉尘欲伴金罍。何日舞裯
歌扇，后堂重到惟梅郡有惟梅堂。

选冠子

雨脚报晴，云容呈瑞，夜雪萦盈连昼。千
岩曳缟，万瓦堆琼，稍稍冷侵怀袖。鹤氅神仙，
兔园宾客，高会坐移清漏。想灞陵桥畔，苦吟
缓辔，耸肩寒瘦。


向此际、色映棠阴，香传梅影，寒力更欺
尊酒。左符词伯，蛮笺巧思，不道起风飞柳。
舞态弓弯，一声低唱，蛾笑绿分烟岫。任杯行
潋潋，为公沈醉，莫教停手。

好事近

为钱处和寿

缥酒颂青春，不减宜城桑落。楼下玉人凝

— 猿 —



笑，散万英千萼。

绣衣当日帝王州，横飞看雕鹗。闻道赐环书下，向金门持橐。

鹧鸪天

次曾守游梅园韵

领客携尊花底开。薄寒初送雨声来。一声未弄林间笛，几片低飞阁下梅。

酬的处，少迟回。不妨春雪撒银杯。玉肌莫放清香散，更待晴时赏一回。

浣溪沙

钱范子芬行

整顿春衫欲跨鞍。一杯相属少开颜。愁眉不似旧时弯。


未见两星添柳宿，忍教三叠唱阳关。相思空望会稽山。

又

以鸳鸯梅送曾守，是日，曾守携家游南园

报道倾城出洞房。水边疏影弄清香。风流

— 源 —



更有小鸳鸯。

蝉鬓半含花下笑，蛾眉相映醉时妆。梦魂不到白云乡。

又 以鸳鸯梅送钱漕

玉颊微醺怯晚寒。可怜凝笑整双翰。枝头一点为谁酸。

只恐轻飞烟树里，好教斜插鬓云边。淡妆仍向醉中看。

又 席中答钱漕

忆得熙春晓立班。使星曾入紫微垣。归来小饮友芝兰。

投辖风流今复见，开尊礼数自来宽。更看宝唾写乌阑。

清平乐 以千叶粉红牡丹送曾守

轻红淡白。蓬阆神仙谪。魏紫姚黄夸异色。到得海边初识。

— 缘 —

